

199.—HE TANGI MO TAIAWHIO.

(Te Arawa).

Na S. Percy-Smith nga whakamarama.

He maha nga tangi mo te parekura i Mokoia, i whakaekera e Hongi Hika. Mo Taiawhio tenei, he rangatira no Te Arawa i mate ki Mokoia. Kaore i te marama na wai tenei waiata i tito. Ko tetahi o nga waiata nunui mo te parekura i Mokoia kei te waiata 5, kei te tangi mo Te Kuru-o-te-marama. Ko te nama 200 tetahi.

(Ref.: M.232, J.9/105, Wars. 256).

Takoto iho ki taku moenga,
Me he ika ora au ki te iwi,
Ki a koutou, e Here¹ ma,
E pukai mai ra i Mokoia.
Na Te Whatanui² i hi te pakake,
Pae ana ko te waha kei uta,
He mango ihu nui.

Homai nga roro no Tahakura,³
Hei kai ake ma Rewharewha.⁴
Haere wareware ko te hoa,
Kihai i kai i a Te Waero.⁵
Engari ano te marama
Eke penu tonu ki runga.
Na Te Waru⁶ nga mahara,
Puhaina mai ki a Te 'Paraha;⁷
Arahina⁸ mai i Tauranga
Te huna i Rotorua.
Tena ano te homai na
Ki te Potiki⁹ na Papawharanui,
Ki a Te Mutukuri.¹⁰
Hei tua i a Te¹¹ Pae,
Hinga rawa ki raro ra.

¹Here: Kei te ngaro tenei.

²Te Whatanui: E kii ana na Te Whatanui raua ko Te Rauparaha i whakakiki ki a Te Arawa kia patua te ope o Ngapuhi, a Te Paeoterangi. I te takiwa raua o Rotorua i te wa i tae mai ai taua ope ki reira.

³Tahakura: Kei te ngaro tenei.

⁴Rewharewha: Kei te ngaro tenei.

⁵Te Waero: Ko tetahi o te ope a Te Paeoterangi, i patua e Tuhourangi ki Motutawa, Rotokakahi, i te tau 1822.

⁶Te Waru: He rangatira no Tauranga. I tae a Te Rauparaha ki Tauranga, ki a Te Waru, hei awhina i tana haere ki te upoko o te ika. Ko te ahua na Te Waru te whakaaro kohuru i a Nga-Puhi.

⁷Te Paraha: Ko Te Rauparaha, nana i tino whakakiki a Tuhourangi, ka whakaee a Te Mutukuri kia patua a Te Paeoterangi. (Wars. 205).

⁸Arahina mai: Na tetahi hapu o Tauranga, na Ngati-Pukenga, i arahi mai a Hongi Hika ratau ko tana ope i tae mai ai ki Mokoia.

⁹Te Potiki na Papawharanui: Mo Tuhourangi tipuna, tau iho ki a Tuhourangi hapu, na reira nei i patu a Nga-Puhi ki te Motutawa. Ki te M.232 me te Wars. 256 "te putiki na Papawharanui."

¹⁰Te Mutukuri: Ko te rangatira o Tuhourangi nana i patu te ope a Te Paeoterangi.

¹¹Te Pae': Te Paeoterangi.